

**ANTEPROXECTO DE LEI GALEGA PARA A PREVENCIÓN E TRATAMENTO  
INTEGRAL DA VIOLENCIA DE XÉNERO**

---

## EXPOSICIÓN DE MOTIVOS

### I

A violencia e os malos tratos teñen formado parte da vida cotiá de moitas mulleres ao longo do tempo. Mais esta violencia estaba normalizada e naturalizada, co que non tiña recoñecemento como tal, provocando a súa invisibilidade e ocultamento. Grazas aos movementos de mulleres que a partir dos anos setenta comezaron a desenvolver de xeito colectivo e organizado accións en contra da violencia, esta comezou a ser percibida e a ter un certo impacto social. Como consecuencia desta acción foron os organismos internacionais os primeiros que tomaron conciencia da difícil situación en que se atopaban moitas mulleres e os que, por medio de diversas declaracións, deron visibilidade a unha lacra social agachada ata ese momento na privacidade dos fogares.

### II

En 1980 a ONU, na súa II Conferencia Internacional sobre as Mulleres declarou, por primeira vez, que a violencia que se exerce contra as mulleres na familia é o crimen máis encuberto do mundo e plantexou a importancia de visibilizar publicamente esta problemática que afecta a un grande número de mulleres.

En 1985, celebrouse en Nairobi a Conferencia Mundial para o Exame e Avaliación dos Logros do Decenio das Nacións Unidas para as Mulleres, na que se declarou que a violencia exercida contra as mulleres supón un importante obstáculo para a paz.

En 1993, a Conferencia Mundial de Dereitos Humanos, celebrada en Viena baixo o auspicio da ONU, recoñece que os Dereitos Humanos das mulleres e as nenas son parte “inalienábel, integrante e indivisíbel dos Dereitos Humanos Universais”. O 20 de decembro do mesmo ano, a Asemblea Xeral da ONU aprobou a “Declaración sobre a Eliminación da Violencia cara a Muller”, na que recoñece que “a violencia cara a muller constitúe unha manifestación de relacións de poder historicamente desiguais entre o home e a muller, que conduciron á dominación da muller; e á discriminación na súa contra por parte do home e impedido o adianto pleno da muller e que a violencia contra a muller é un dos mecanismos sociais fundamentais polo que se forza á muller a unha situación de subordinación respecto do home”. O artigo 1º define, por primeira vez, a violencia cara a muller como: “todo acto violento baseado na pertenza ao sexo feminino que teña ou poida ter como resultado un dano ou sufrimento físico, sexual ou psicolóxico para a muller, así como as ameazas de tales actos,

a coacción ou a privación arbitraia da liberdade, tanto se se produce na vida pública como na privada”.

### III

En 1995, a Declaración de Beijing, xurdida da IV Conferencia Mundial sobre a Muller, aprobou a Plataforma de Acción co fin de potenciar o papel das mulleres en todas as esferas da vida. Nela reconécese que a violencia de xénero é un obstáculo para o logro de obxectivos de igualdade, desenvolvemento e paz, que menoscaba ou impede o disfrute pola muller dos seus Dereitos Humanos e das liberdades fundamentais. Cómpre destacar como o documento equipara por primeira vez a violencia contra as mulleres como violencia de xénero, entendendo esta como unha construción cultural que rixe as relacións sociais e de poder entre os sexos. Esta construción cultural é a base sobre a que se establecen os códigos normativos e axiolóxicos a partir dos cales podemos falar do masculino e o feminino nun marco de relacións de poder asimétricas, pero susceptibles de ser modificadas no tempo a través dos procesos de socialización.

En 2002 a Comisión de Dereitos Humanos da ONU, na súa resolución 2002/52 sobre “a eliminación da violencia contra a muller”, á vez que condena claramente todos os actos de violencia perpetrados contra as mulleres e as nenas, inclúe na súa definición sobre a violencia de xénero non só as distintas manifestacións que da mesma que xa foran incluídas nesta categoría, senón tamén outras novas como “os crímenes pasionais, o matrimonio precoz e forzado, o infanticidio de nenas, os ataques de ácido e a violencia relacionada coa explotación sexual comercial e a explotación económica”.

### IV

No Estado español producíronse adiantos legislativos en materia de loita contra a violencia de xénero: así, a Lei Orgánica 11/2003, de 29 de setembro de Medidas Concretas en materia de Seguridade Cidadá, Violencia Doméstica e Integración Social dos Estranxeiros; a Lei Orgánica 15/2003, de 25 de novembro pola cal modifícase a Lei Orgánica 10/1995, de 23 de novembro, do Código Penal, ou a Lei 27/2003, de 31 de xullo, reguladora da Orde de Protección das Vítimas da Violencia Doméstica.

A Lei Orgánica 1/2004, de 28 de decembro, de medidas de protección integral contra a violencia de xénero, que reconece un feito diferencial de xénero.

## V

En Galicia a Lei 7/2004, do 16 de xullo, galega para a igualdade de homes e mulleres dedicou os seus artigos 19 e 20 á regulación da violencia contra as mulleres. Neles contéñense previsións xerais sobre as medidas precisas para a erradicación da violencia contra as mulleres, así como algunhas actuacións xudiciais en materia de violencia contra as mulleres. Trátase, dende logo, dun primeiro paso, mais a día de hoxe cómpre dotar á sociedade galega dun marco normativo propio e completo nesta materia. Un marco normativo que faga da prevención o pilar básico da acción administrativa nesta materia, que facilite un adecuado proceso de socialización da violencia de xénero e que remova vellos estereotipos sexistas e pule por unha sociedade sen violencia. Con esta lei preténdese dotar aos poderes públicos e á sociedade galega dun instrumento acaído para prever, tratar e erradicar a violencia de xénero e, ao fin, conquistar unha verdadeira realización do principio de igualdade.

## VI

Sen embargo, a socialización non remata coa etapa educativa, os seres humanos vivimos un proceso constante de socialización, de aí a importancia que cobra a sensibilización social sobre a violencia de xénero así como a formación dos profesionais que traballan directa ou indirectamente con mulleres que poden estar en situación de sufrida. Considérase que a actualización en materia de igualdade dos profesionais, é unha garantía para o bo funcionamento das medidas de atención e acompañamento ás mulleres que se implementan no seguinte texto. Son os profesionais máis achegados á cidadanía os primeiros en poder detectar situacións de violencia e tamén os máis indicados para dar unha resposta pronta e axeitada. Por este motivo, as administracións deben comprometer os seus esforzos en dar unha formación que elimine mitos sobre a violencia de xénero e prepare aos profesionais para facer efectivos os protocolos de actuación que se desprenden do texto desta lei.

Por último, se o traballo en prevención é un traballo de futuro e se establece a mediano e longo prazo é necesaria unha resposta inmedita para as mulleres que están sufrindo violencia de xénero en Galicia.

## VII

No seguinte texto establécense os mimbres lexislativos para configurar en Galicia unha rede de información e atención integral ás mulleres que sofren violencia de xénero que permita artellar medidas de recuperación psicolóxica, de apoio económico, de inserción laboral e de acceso a vivenda.

## VII

A lei estruturase nun título preliminar, tres títulos e as correspondentes disposicións adicionais e finais.

No título preliminar defínese o obxecto da lei e descríbense as diferentes formas de violencia de xénero. Así, a lei ten por obxecto a adopción de medidas integrais dirixidas á sensibilización, prevención e atención para o tratamento da violencia exercida contra as mulleres, así como a protección e asistencia ás vítimas. Ademais, quedan dentro do ámbito de aplicación da lei todas as mulleres que vivan, residan ou traballen en Galicia e sufran calquera das formas de violencia descritas

No título I regúlanse as medidas de prevención da violencia de xénero. Ao longo dos catro capítulos deste título abórdanse: en primeiro lugar, as medidas precisas para unha adecuada sensibilización social fronte a este problema así como o papel primordial que deben cumprir os medios de comunicación social neste eido; en segundo lugar as medidas de investigación e formación; en terceiro lugar as medidas a adoptar no eido da educación regrada, entre as que comprende salienta a revisión e adaptación do currículo educativo; e, por último, no capítulo IV trátase da mediación familiar como un instrumento adecuado para facilitar unha aproximación pacífica das posicións das partes implicadas nos procesos de ruptura de parella.

O Título II regula as accións dos poderes públicos e dos profesionais precisas para protexer e asistir ás mulleres que sofren violencia de xénero. Para isto garántese unha asistencia sanitaria, xurídica, social e psicolóxica integral ás mulleres que sufran violencia. Os dispositivos de alarma (teleasistencia), e os programas de reeducación son tamén instrumentos básicos para protexer a aquelas que sufran violencia. Agora ben, todas estas medidas non son suficientes se ao final as vítimas carecen dos recursos precisos para iniciar unha nova vida en liberdade e alonxada dos seus agresores. Con este fin, e seguindo o camiño aberto pola prestación periódica de apoio ás mulleres que sofren violencia de xénero (salario da liberdade) , non so se regulan prestacións económicas, senón tamén un proceso abreviado para a obtención da RISGA e axudas escolares para as fillas e fillos que sufriran violencia no seu entorno. Co mesmo fin créase o fongo galego de garantía de indemnizacións e se establecen accións en materia de acceso a unha vivenda digna.

O título III adícase á organización do sistema de protección e asistencia integral fronte á violencia de xénero. Nese eido comprende salienta a creación do Centro de Recuperación Integral para mulleres que sofren violencia de xénero e das oficinas de información ás vítimas dos delitos.

## **TÍTULO PRELIMINAR DISPOSICIÓN XERAIS**

### **Artigo 1. Obxecto.**

1. Constitúe o obxecto desta Lei a adopción en Galicia de medidas integrais para a sensibilización, prevención e tratamento da violencia de xénero, así como a protección e apoio ás mulleres que a sofren.

2. Aos efectos desta Lei enténdese por violencia de xénero calquera acto violento ou agresión, baseados nunha situación de desigualdade no marco dun sistema de relacións de dominación dos homes sobre as mulleres, e de uso xeneralizado da violencia como forma de relación entre as persoas, que teña ou poida ter como consecuencia un dano físico, sexual ou psicolóxico, incluídas as ameazas de tales actos e a coacción ou privación arbitraria da liberdade, tanto se ocorren no ámbito público como na vida familiar ou privada.

### **Artigo 2. Ámbito de aplicación.**

As medidas contempladas nesta Lei serán de aplicación a todas as mulleres que vivan, residan ou traballen en Galicia, así como ás persoas delas dependentes, e que se atopen nunha situación de violencia de xénero.

### **Artigo 3. Formas de violencia.**

Aos efectos desta Lei considéranse formas de violencia de xénero, fundamentalmente, as seguintes:

a) Violencia física, que inclúe calquera acto de forza contra o corpo da muller, con resultado ou risco de producir lesión física ou dano, exercida por quen sexa ou fora o seu cónxuxe ou por quen estea ou estivera ligado a ela por análoga relación de afectividade, aínda sen convivencia. Igualmente terán a consideración de actos de violencia física contra a muller os exercidos por homes do seu entorno familiar ou do seu contorno máis achegado.

b) Violencia psicolóxica, que inclúe toda conducta, verbal ou non verbal, que produza na muller desvalorización ou sufrimento, a través de ameazas, humillacións ou vexacións, esixencia de obediencia ou sumisión, coerción, insultos, aillamento, culpabilización ou limitacións do seu ámbito de liberdade, exercida por quen sexa ou fora o seu cónxuxe ou por quen estea ou estivera ligado a ela por análoga relación de afectividade, aínda sen convivencia. Igualmente terán a consideración de actos de violencia psicolóxica contra a muller os exercidos por homes do seu entorno familiar ou do seu contorno máis achegado.

c) Violencia económica, que inclúe a privación intencionada e non xustificada legalmente, de recursos para o benestar físico ou psicolóxico da muller e das súas fillas e fillos ou a discriminación na disposición dos recursos compartidos no ámbito da convivencia de parella.

d) Violencia sexual e abusos sexuais, que inclúen calquera acto de natureza sexual forzada polo agresor ou non consentida pola muller, abarcando a imposición, mediante a forza ou con intimidación, de relacións sexuais non consentidas, e o abuso sexual, con independencia de que o agresor garde ou non relación conxugal, de parella, afectiva ou de parentesco coa vítima.

e) Acoso sexual, que inclúe aquelas conductas consistentes na solicitude de favores de natureza sexual, para sí ou para unha terceira persoa, prevaléndose o suxeito activo dunha situación de superioridade laboral, docente ou análoga, co anuncio expreso ou tácito á muller de causarlle un mal relacionado coas expectativas que a vítima teña no ámbito de dita relación, ou baixo a promesa dunha recompensa ou premio no ámbito da mesma.

f) O tráfico de mulleres e nenas con fins de explotación, calquera que fora a relación que una á vítima co asesor e o medio utilizado.

#### **Artigo 4. Principios xerais**

Os principios xerais que orientan o contido desta Lei son:

1.- Consideración da violencia de xénero como unha forma extrema de desigualdade. Polo tanto, unha parte importante da Lei incide na prevención da violencia a través da sensibilización, a investigación e a formación en materia de igualdade.

2.- Carácter integral. A presente Lei ten un carácter integral, e implica de xeito coordinado ás diferentes instancias e administracións que teñen un papel destacado na prevención e tratamento da violencia de xénero. As medidas previstas teñen en conta a totalidade de danos que mulleres sofren como consecuencia da violencia de xénero.

3.- Perspectiva de xénero. Na totalidade das actuacións previstas nesta Lei implementarase a perspectiva de xénero, baseada na análise dos roles de xénero tradicionalmente impostos, e que sitúan a violencia como un mecanismo de control cara á muller.

4.- Eliminación da victimización secundaria . Todas as accións que as administracións públicas realicen contra a violencia de xénero evitarán a victimización secundaria das mulleres, que comporta ir de recurso en recurso para obter só respostas parciais á situación plantexada, e non reproducirán ou perpetuarán os estereotipos sobre as mulleres e a violencia de xénero. Por isto, deben garantir a especialización dos colectivos profesionais que interveñen no proceso.

5. Cooperación y coordinación. Os poderes públicos galegos intensificarán as accións para a cooperación e coordinación interinstitucional dos recursos e instrumentos contra a violencia de xénero, promovendo a colaboración e a participación das asociacións de mulleres, así como das entidades e organizacións da sociedade civil. Os concellos son elementos clave dada a súa experiencia e o seu coñecemento desde a proximidade á cidadanía.

## **Artigo 5. Acreditación da situación de violencia de xénero.**

Aos efectos desta Lei, a situación de violencia acreditarase, segundo o suposto, por medio dunha das formas seguintes:

- a) Certificación da orde de protección ou da medida cautelar, ou testimonio ou copia autenticada polo/a secretario/a xudicial da propia orde de protección ou da medida cautelar.
- b) Sentenza de calquera orde xurisdiccional, que declare que a muller sufriu violencia en calquera das modalidades definidas nesta Lei.
- c) Certificación dos Servizos Sociais e/ou Sanitarios da Administración Pública Autonómica ou Local.
- d) Certificación dos servizos de acollida da Administración Pública Autonómica ou Local.
- e) Informe do Ministerio Fiscal que indique a existencia de indicios de violencia
- f) Informe da Inspección de Traballo e Seguridade Social.
- g) Calquera outro que se estableza regulamentariamente

## **TÍTULO I PREVENCIÓN DA VIOLENCIA DE XÉNERO**

### **CAPÍTULO I Medidas de sensibilización contra a violencia de xénero**

## **Artigo 6.-Deseño, elaboración e difusión de campañas.**

1.- O departamento competente en materia de políticas de igualdade, en coordinación cos restantes departamentos da Xunta de Galicia, porá en marcha de xeito periódico, campañas de información e sensibilización que teñan como obxectivo mudar os estereotipos sexistas e que incidan no rexeitamento social sobre todas as formas de violencia de xénero. As campañas terán especial divulgación nos centros escolares, educativos, sociais, sanitarios, laborais, culturais e deportivos.

2.- As campañas que se desenvolvan adicarán atención específica á sensibilización e á formación da poboación xuvenil na prevención e identificación de actitudes que constitúan actos de violencia de xénero. Así mesmo, as campañas farán posible a súa accesibilidade ás mulleres con máis dificultades para achegarse aos recursos e á información: ás mulleres con discapacidade, ás mulleres inmigrantes e ás mulleres en risco ou en situación de exclusión social.

Teranse en conta as dificultades que teñen as mulleres do ámbito rural para acceder á información e, nese sentido, deseñaranse campañas específicas nese ámbito.

3.- Así mesmo, a Xunta de Galicia porá en marcha os acordos necesarios con outras Administracións Públicas para garantir a difusión das campañas de sensibilización entre os centros dependentes da Administración local, Administración de xustiza e entre as Forzas e Corpos de Seguridade do Estado e a policía local.

4.- Igualmente, a Xunta de Galicia levará a cabo accións de sensibilización dirixidas á poboación masculina, incidindo na necesidade de promover unha sociedade máis igualitaria entre mulleres e homes.

#### **Artigo 7.- Fomento do movemento asociativo.**

1.- O departamento competente en materia de políticas de igualdade establecerá anualmente un Plano de axudas económicas destinadas ás asociacións de mulleres con sede en Galicia, para o desenvolvemento de actividades que promovan a prevención, protección, asistencia e acompañamento ás mulleres que sofren violencia de xénero

2.- O departamento competente en materia de políticas de igualdade establecerá axudas económicas destinadas a que o movemento asociativo en Galicia desenvolva actividades que promovan a prevención e a erradicación da violencia de xénero.

#### **Artigo 8.- Actividades culturais e artísticas**

A Administración da Xunta de Galicia impulsará todo tipo de manifestacións culturais e artísticas que potencien aspectos recollidos nesta Lei, e nas que se propoñan estratexias ou espazos dirixidos a sensibilizar á sociedade na prevención e tratamento da violencia de xénero.

#### **Artigo 9.- Tratamento da información**

1.- A Xunta de Galicia, a través dos departamento competente no ámbito da comunicación, garantirá que os medios de comunicación de titularidade autonómica e aqueles nos que participe ou os que financie, non emitan na súa programación imáxenes ou contidos que resulten contrarios á finalidade e espírito desta Lei.

2.- Igualmente, a Xunta de Galicia velará para que nos medios de comunicación de Galicia se ofrezca un tratamento axeitado das noticias sobre violencia de xénero, e garantirá que cando se difundan novas relativas á violencia de xénero se agreguen pautas informativas dos recursos de prevención, asistencia e protección existentes en Galicia e que garden relación co feito difundido.

3.- O departamento competente en materia de políticas de igualdade elaborará e difundirá un manual de estilo dirixido a que as e os profesionais dos medios de comunicación impriman o tratamento mediático axeitado ás informacións relacionadas coa violencia de xénero.

#### **Artigo 10.- Convenios autorregulación**

A Xunta de Galicia promoverá acordos e convenios de autoregulación en todos os medios de comunicación social, achegando os criterios orientadores que sirvan como pauta de actuación

sobre como tratar a violencia de xénero e a imaxe das mulleres. Estas normas de autoregulación terán carácter de códigos deontolóxicos ou de contido ético.

#### **Artigo 11.- Contidos e publicidade en relación coa violencia de xénero**

1.- Nos medios de comunicación social que actúen no ámbito de Galicia, evitarase a realización e difusión de contidos e anuncios publicitarios que mediante o seu tratamento ou posta en escena, xustifiquen, banalicen ou inciten á violencia de xénero, ou nos que se conteñan, tácita ou implícitamente, mensaxes misóxinos ou que atenten contra a dignidade das mulleres.

2.- A publicidade institucional e a publicidade dinámica en Galicia respectará as disposicións establecidas sobre publicidade e velará especialmente polo respecto aos principios especificados no punto 1 deste artigo.

### **CAPÍTULO II**

#### **Medidas de investigación e de formación en materia de violencia de xénero**

#### **Artigo 12. Potenciación da investigación sobre a violencia de xénero**

1.- A Xunta de Galicia, a través dos departamentos competentes en materia de políticas de igualdade e de investigación, desenvolvemento e innovación, potenciará a investigación sobre as causas e consecuencias da violencia de xénero, así como sobre os medios necesarios para evitala, o grao de sensibilización da sociedade ante a mesma e os medios necesarios para o seu tratamento.

2. Igualmente, a Xunta de Galicia difundirá o resultado dos estudos e investigacións que se consideren de interese. A difusión realizarase de xeito universal e gratuito, e terá en conta a utilización das tecnoloxías da información e a comunicación.

#### **Artigo 13. Rexistros administrativos.**

A Xunta de Galicia garantirá a existencia de rexistros administrativos unificados e actualizados sobre a violencia de xénero en Galicia, así como sobre a situación das nenas e nenos que no seu ámbito familiar conviven con este tipo de situacións, segundo o establecido na Lei orgánica 15/1999, do 13 de decembro, de protección de datos de carácter persoal,

#### **Artigo 14-Formación nas universidades**

As Administracións Educativas no ámbito das súas competencias, asegurarán que a totalidade dos estudos conducentes á obtención de licenciaturas e diplomaturas universitarias en disciplinas que habiliten para o exercicio de profesións que teñan relación directa coa violencia de xénero, se incorporen contidos relacionados coa comprensión desta violencia, e dirixidos á capacitación para a prevención, detección precoz, intervención e/ou apoio ás mulleres que a sofren..

### **Artigo 15.- Formación da totalidade das e dos profesionais**

1.- A Xunta de Galicia garantirá, nos termos que se establezan regulamentariamente, e promoverá , mediante os instrumentos necesarios, a formación en igualdade de todos e todas as profesionais que traballan en ámbitos relacionados directa ou indirectamente coa violencia de xénero, e en especial dos e das profesionais da sanidade, dos servizos sociais, educativos, das Forzas e Corpos de Seguridade e dos operadores xurídicos.

2.- A estes efectos, o departamento competente e os colexios profesionais correspondentes, velarán para que na formación inicial e nos seus programas formativos se incorporen módulos específicos de prevención, atención, asistencia e/ou tratamento de situacións de violencia de xénero.

3.- A Xunta de Galicia, a través do departamento competente en materia de políticas de igualdade, deseñará programas específicos de formación en materia de violencia de xénero e poraos a disposición de calquera ente, organismo ou departamento, e da sociedade en xeral, para a súa aplicación nas diversas accións formativas.

## **CAPÍTULO III Medidas no Ámbito Educativo**

### **Artigo 16.- Actitudes**

A Administración educativa galega, en colaboración co departamento competente en materia de políticas de igualdade, impulsará a realización de actividades dirixidas á comunidade escolar para a prevención de comportamentos e actitudes sexistas e da violencia de xénero, e destinadas a afondar nas estratexias para a análise e resolución dos conflitos, así como na aprendizaxe da convivencia baseada no respecto a todas as persoas, garantindo e fomentando actitudes, valores e capacidades que contribúan a un pleno desenvolvemento en igualdade.

### **Artigo 17.- Edición e adaptación de materiais**

1.- O departamento competente en materia de políticas de igualdade e a Administración educativa galega, velarán para que, no ámbito das súas competencias, na edición e na revisión dos materiais educativos e nos libros de texto, se exclúan todos os contidos que vulneren o principio de igualdade.

Co mesmo fin se revisarán e adaptarán os materias do ámbito educativo non regulado

2.- O departamento da Xunta de Galicia competente en materia de políticas de igualdade e o departamento da Xunta de Galicia competente en materia de educación, desenvolverán e difundirán proxectos e materiais didácticos actualizados, e dirixidos a todos os niveis educativos, que conteñan pautas de coducta que transmitan valores de respecto e igualdade, de xeito que se favoreza a prevención de actitudes e situacións violentas.

### **Artigo 18.- Revisión e adaptación do currículo educativo**

O departamento da Xunta de Galicia competente en materia de educación, e co obxecto de garantir a igualdade real entre mulleres e homes, levará a cabo a revisión e, se é o caso, a adaptación en todos os niveis educativos, dos contidos, procedementos, actitudes e valores que conforman o currículo educativo dende unha perspectiva de xénero.

En todo caso, o currículo regulador da práctica docente para cada un dos niveis, etapas, ciclos, graos e modalidades do sistema educativo, adaptatase ao disposto no artigo 9 da Lei 7/2004, do 16 de xullo, galega para a igualdade de mulleres e homes.

#### **Artigo 19.- Planos de acción tutorial**

Os planos de acción tutorial de todos os niveis educativos incluírán apartados específicos destinados a reflexionar sobre os modelos masculino e feminino, así como unha orientación de estudos e profesións baseada nas aptitudes e capacidades das persoas e non na pertencenza a uno ou outro sexo.

#### **Artigo 20.- Proxectos educativos de centro**

Os proxectos educativos de centro incorporarán a perspectiva de xénero na súa elaboración e desenvolvemento, e propiciarán medidas de coeducación nos contidos, nas actitudes e nos procedementos.

#### **Artigo 21.- Consellos Escolares e Consello Escolar de Galicia**

1- A administración educativa galega, no ámbito das súas competencias, adoptará as medidas necesarias para garantir que os consellos escolares impulsen medidas educativas que promovan a igualdade real entre homes e mulleres, a coeducación e a prevención da violencia de xénero no centro educativo.

2- Garantírase a representación e participación no Consello Escolar de Galicia do órgano da Administración Autónoma que ostente a competencia en materia de políticas de igualdade.

3- O Consello Escolar de Galicia, en colaboración co departamento da Xunta de Galicia competente en materia de políticas de igualdade elaborará un informe anual sobre a situación da coeducación e prevención da violencia de xénero nos centros educativos de Galicia.

#### **Artigo 22.- Inspección educativa**

Os servizos de inspección educativa do departamento da Xunta de Galicia competente en materia de educación velarán polo cumprimento e aplicación de todos os principios recollidos neste capítulo no sistema educativo, destinados a fomentar a igualdade real entre mulleres e homes.

## **CAPÍTULO IV**

### **Da mediación familiar**

#### **Artigo 23.- Mediación familiar**

- 1.- Os programas de mediación familiar terán como finalidade, entre outras, o asesoramento, a orientación ou a aproximación das posicións das partes en conflito para regular de común acordo, os efectos da ruptura da unión da parella así como os conflitos de convivencia, en beneficio da totalidade dos membros da unidade familiar
- 2.- O departamento da Xunta de Galicia competente en materia de políticas de igualdade , a través dos seus recursos propios, ofrecerá programas de mediación e orientación familiar, de xeito individual ou dirixidos ás familias no seu conxunto cando exista unha situación de deterioro da convivencia familiar. Estes programas contemplarán de xeito prioritario a prevención de situacións de violencia de xénero .
- 3.- O persoal especializado dos servizos de mediación elaborará en cada caso, un informe no que se especifique a idoneidade do recurso de mediación.
- 4.- Interrompirase, ou no seu caso, non se iniciará, calquera proceso de mediación familiar cuando no mesmo esté implicada unha muller que sufrira ou sofra violencia de xénero.

## **TÍTULO II**

### **PROTECCIÓN E ASISTENCIA FRONTE A VIOLENCIA DE XÉNERO**

#### **CAPÍTULO I**

##### **Medidas no Ámbito sanitario e psicolóxico**

#### **Artigo 24.-Dereito a atención sanitaria**

- 1.- Os servizos públicos de saúde garantirán ás mulleres que sofren ou sufriran calquera tipo de violencia de xénero que recolle esta Lei, o dereito á atención sanitaria, e ao seguimento da evolución do seu estado de saúde, ata o seu total restablecemento, no concernente á sintomatoloxía ou as secuelas derivadas da situación de violencia sufrida.
- 2.- Nestes supostos, os servizos serán gratuitos e accesibles con carácter urxente, se é o caso, para todas as mulleres que sufran ou sufriran violencia de xénero, garantindo a privacidade e a intimidade das mulleres, e respectando as decisións que elas acaden.
- 3- Os Planos de saúde da Xunta de Galicia contemplarán medidas específicas para a prevención, detección, atención e intervención nos casos de violencia de xénero. Así mesmo, en ditos Planos, implementaranse disposicións específicas que contribúan a avaliar o impacto e os efectos da violencia de xénero sobre a saúde das mulleres.

## **Artigo 25.- Atención psicolóxica**

1.- A asistencia psicolóxica inmediata será considerada como unha atención básica en materia de saúde e deberá procurar a desaparición da sintomatoloxía presentada e a total rehabilitación psicolóxica para conquistar unha recuperación integral das mulleres, aportándolles mecanismos que promociónen a súa autonomía e lles impidan verse de novo envoltas en relacións de maltrato.

2.- Recoñécese o dereito a asistencia psicolóxica gratuita para as mulleres que sufran violencia de xénero, que comprenderá a atención inicial e o seguimento durante todo o proceso terapéutico. Consideraranse prioritarias as intervencións con mulleres que se atopen nunha situación de violencia e presenten problemas de saúde mental, dependencia de substancias adictivas e/ou outras patoloxías que requiran un tratamento psicoloxico específico.

3.- Recoñécese o dereito a asistencia psicolóxica gratuita para as e os menores e para outras persoas dependentes que vivan ou padezan situacións de violencia de xénero, que comprenderá medidas de apoio psicosocial específicas e adaptadas ás súas características e necesidades.

4.- A Xunta de Galicia desenvolverá programas de atención psicolóxica gratuita, destinados a homes con problemas de control da violencia machista.

## **Artigo 26.- Protocolo de actuación.**

1.- O departamento da Xunta de Galicia competente no ámbito sanitario elaborará, nos termos que se estableza regulamentariamente, un protocolo que contemple pautas uniformes de actuación sanitaria. Asemade, elaborará os procedementos de coordinación das distintas instancias que interveñen de xeito específico na atención sanitaria das mulleres que sofren violencia de xénero, en colaboración co departamento da Xunta de Galicia competente en materia de políticas de igualdade.

2.- Asimesmo, establecerase un parte de lesións único e universal para todos os centros sanitarios de Galicia, que será de obrigado cumprimento para todas e todos os profesionias no caso de lesións físicas.

## **Artigo 27.- Rexistro de casos**

1.- O departamento da Xunta de Galicia competente no ámbito sanitario implantará un sistema de rexistro de casos de violencia de xénero nos servizos sanitarios, que permita dimensionar o problema, e do que facilitará información periódica ao departamento da Xunta de Galicia competente en materia de políticas de igualdade, segundo o establecido na Lei orgánica 15/1999, do 13 de decembro, de protección de datos de carácter persoal,.

2.- Nas enquisas de saúde incluíranse indicadores sobre a violencia de xénero.

### **Artigo 28.- Seguimento**

1. No departamento da Xunta de Galicia competente no ámbito sanitario e coa colaboración co departamento competente en materia de políticas de igualdade, constituirase unha comisión que velará pola aplicación das directrices establecidas neste capítulo, avaliará o xeito de aplicación, os problemas atopados e emitirá un informe anual para analizar os resultados obtidos.
2. Regulamentariamente establecerase a súa composición e o seu funcionamento.

## **CAPÍTULO II Medidas no ámbito xudiciario**

### **Artigo 29.- Atención xurídica**

- 1.- As mulleres en situación de violencia de xénero teñen dereito a recibir toda a información xurídica relacionada coa situación de violencia.
- 2.- O Servizo de Atención 24 horas, previsto no artigo 52 desta Lei, garantirá, en todo caso, a atención xurídica permanente, todos os días e horas do ano, en casos de violencia de xénero.
- 3.- O Servizo de Orientación Xurídica dos colexios profesionais da avogacía de Galicia garantirá unha información e atención xurídica especializada en materia de violencia de xénero. As persoas profesionais que presten estes servizos haberán de efectuar cursos de formación específica nesta materia como requisito por acceder a estes servizos.

### **Artigo 30.- Asistencia letrada**

- 1.- As mulleres en situación de violencia de xénero terán dereito á asistencia xurídica gratuíta na forma establecida na Lei 1/96, do 10 de xaneiro, de asistencia xurídica gratuíta, modificada pola Lei 16/2005, do 18 de xullo, e pola Lei Orgánica, 1/2004, do 28 de decembro, de medidas de protección integral contra a violencia de xénero.
- 2.- Para os efectos do previsto no artigo 3.3 da Lei 1/1996, do 10 de xaneiro, de Asistencia Xurídica gratuíta, os medios económicos das mulleres que acrediten por calquera dos medios previstos no artigo 5 da presente Lei atoparse en situación de violencia de xénero, serán valorados individualmente, cos límites establecidos á lexislación aplicable.
- 3.- A totalidade dos colexios profesionais de avogados de Galicia disporán dun turno de oficio en materia de violencia de xénero, debendo superarse, para o acceso ao mesmo, os cursos de formación o perfeccionamento que se establezan
- 4.- A Xunta de Galicia, a través do departamento competente en materia de xustiza, garantirá que as mulleres en situación de violencia de xénero estean asistidas por unha avogada ou avogado e, se procede, procuradora ou procurador que recibiran formación especializada nesta materia.

### **Artigo 31.-Exercicio da acción popular**

1.- A Administración da Xunta de Galicia exercerá a acción popular, nos procedementos penais por violencia de xénero, nos casos de morte ou lesións graves da muller, na forma e condicións establecidas pola lexislación procesal.

2.- A acción popular hase de exercer co consentimento da muller ou da familia.

### **Artigo 32.-Personación da Xunta de Galicia nos procedementos penais iniciados por causas de Violencia de Xénero**

1.- No casos en que proceda, a Xunta de Galicia poderá acordar a súa presenza nos procedementos penais instados por causa de violencia de xénero, en calidade de parte perxudicada civilmente, conforme ao establecido no artigo 110 de la Lei de Enxuízamento Criminal.

2.- A representación e defensa en xuízo corresponderalle aos Servizos Xurídicos da Xunta de Galicia, sen perxuízo de que as mencionadas funcións de representación e defensa en xuízo poidan ser encomendadas, a un ou máis profesionais da avogacía colexiados en exercicio, de acordo co previsto no artigo 447 da Lei Orgánica do Poder Xudicial.

### **Artigo 33-Intervención da administración.**

1.- O departamento competente en materia de políticas de igualdade, cando teña coñecemento dunha situación na que as e os menores convivan en situacións de violencia de xénero, intervirá segundo o disposto na Lei 3/1997, de 9 de xuño, galega da familia, a infancia e da adolescencia, e a súa normativa de desenvolvemento, para avaliar e realizar un seguimento da situacións das e dos menores.

2.- Cando departamento competente en materia de políticas de igualdade aprecie que unha ou un menor, como consecuencia dunha situación de violencia de xénero, se atopa nunha situación de desamparo, segundo o establecido na lexislación vixente, declarará dita situación e asumirá a tutela, acordando a medida de protección que proceda.

## **CAPÍTULO III Outras medidas de apoio e protección**

### **Artigo 34.-Deseño e implantación de dispositivos de alarma**

1.- A Xunta de Galicia, a través do departamento competente en materia de políticas de igualdade, coordinará a implantación dos diversos dispositivos de alarma que no seu territorio se poñan a disposición das mulleres que sofren violencia de xénero, e tenderá a unificalos.

2.- Igualmente, a Xunta de Galicia, a través dos departamentos competentes en materia de políticas de igualdade, de xustiza, de protección civil e de investigación innovación e desenvolvemento, deseñará e implantará sistemas especiais de protección para as mulleres que estando nunha situación de risco, os necesiten.

### **Artigo 35.- Programas de intervención con homes en relación á violencia de xénero.**

1.- Xunta de Galicia, a través dos departamentos competentes en materia de políticas de igualdade e de xustiza, facilitará a aqueles agresores que o soliciten, a incorporación a programas específicos de reeducación. Para iso, poderan subscribirse convenios de colaboración con outras administracións públicas e organismos competentes, con capacidade e experiencia na materia.

2.- Os programas de reeducación social comprenderán tratamento psicolóxico, mecanismos de readaptación, resocialización, rehabilitación e outros procedementos técnicos aconsellables. Ditos programas desenvolveranse segundo criterios de calidade que garantan unha intervención profesionalizada na que se inclúa a perspectiva de xénero.

## **CAPÍTULO IV Medidas no ámbito da formación e do emprego**

### **Artigo 36.-Medidas específicas no ámbito da formación e do emprego**

1.- Co fin de favorecer a integración socio-laboral das mulleres que sofren violencia de xénero, a Xunta de Galicia adoptará as seguintes medidas

a) O establecemento das mulleres que sofren violencia de xénero como colectivo preferente na totalidade da normativa autonómica relativa ao establecemento de axudas e subvencións ás empresas para a contratación de persoal.

b) O establecemento dun réxime de axudas e subvencións específico para as empresas que contraten a mulleres que sofren violencia de xénero.

c) O establecemento dun réxime de axudas e subvencións para as mulleres que sofren violencia de xénero cando decidan constituirse como traballadoras autónomas. Neste caso estableceranse tamén axudas para garantir apoio e seguimento tutorial personalizado do seu proxecto.

d) O establecemento dun réxime de axudas e subvencións para o fomento de emprego das mulleres que sofren violencia de xénero a través dos programas de cooperación no ámbito de colaboración coas entidades locais e cos órganos e organismos das administracións públicas distintas da local, universidades e entidades sen ánimo de lucro.

e) A integración preferente das mulleres que sofren violencia de xénero en todos os programas de formación profesional, ocupacional e continúa, e de inserción laboral que se poñan en marcha dende a Xunta de Galicia. Os cursos de formación profesional ocupacional haberán de contemplar axudas económicas para as mulleres que sofren violencia de xénero, segundo as condicións que regulamentariamente se establezan.

2.-. O Servizo Público de Emprego de Galicia garantirá en todos os procedemento de selección que se efectúen a través das oficinas de emprego, a preferencia das mulleres que sufran violencia de xénero, sempre e cando cumpran a totalidade dos requisitos establecidos nas ofertas de emprego.

3.- As competencias da Xunta de Galicia en materia de prevención de riscos para protexer a seguridade e a saúde no traballo integrarán activamente entre os seus obxectivos e nas súas actuacións, o principio de igualdade de trato entre mulleres e homes, investigando a influencia da violencia de xénero na aparición ou no agravamento de enfermidades profesionais ou na causa de accidentes de traballo

#### **Artigo 37.- Planos de igualdade nas empresas**

1.- Os planos de igualdade das empresas fixarán obxectivos concretos e actuacións e especificarán indicadores e boas prácticas encamiñadas a mellorar a situación das mulleres que sofren violencia de xénero, nos ámbitos da selección, contratación, promoción profesional, prevención da violencia e conciliación da vida persoal, familiar e profesional.

2.- As convocatorias de axudas para o establecemento de planos de igualdade nas empresas terán en conta, como criterios preferenciais para os efectos de establecer as axudas e as súas contías, a existencia de medidas de apoio á inserción, permanencia e promoción laboral da mulleres en xeral, e das que sofren violencia de xénero en particular.

3.- A Xunta de Galicia convocará liñas de axudas dirixidas ás empresas que asuman accións de responsabilidade social, cando estas accións se refiran á implantación de medidas económicas, comerciais, laborais, sindicais, ou asistenciais, coa finalidade de mellorar a situación das mulleres en xeral, e das que sofren violencia de xénero en particular.

#### **Artigo 38-Obriga de confidencialidade no ámbito laboral**

O empresariado, a representación sindical, os organismos competentes en materia de emprego e as entidades formadoras están obrigadas a gardar confidencialidade sobre as circunstancias persoais da muller que sufriu ou sofre violencia de xénero, segundo o establecido na Lei orgánica 15/1999, do 13 de decembro, de protección de datos de carácter persoal,.

### **CAPÍTULO V Medidas de carácter económico**

#### **Artigo 39.-Valoración de rendas**

Co fin de favorecer a autonomía das mulleres que estean en situacións de violencia de xénero e aos efectos do dereito a percibir a renda de integración social de Galicia e as outras axudas económicas previstas nesta Lei, quedan excluídos do cómputo das rendas os ingresos do home agresor.

#### **Artigo 40-Prestacións periódicas**

1.- A Xunta de Galicia, a través do departamento competente en materia de políticas de igualdade, establecerá unha prestación económica dirixida ás mulleres que sofren violencia de xénero. Dita prestación terá en conta a situación socio-económica das mulleres e irá dirixida a

posibilitar a súa autonomía e independencia económica respecto do seu agresor, e a tentar axudarlle a romper coa situación de violencia.

2.-Esta prestación aboarase periódicamente, sendo o departamento competente en materia de políticas de igualdade o encargado de regular as bases de convocatoria e as cuantías das axudas

#### **Artigo 41.-Outras prestacións**

A Xunta de Galicia, a través do departamento competente en materia de políticas de igualdade, regulará as bases de convocatoria e tramitará as axudas de pagamento que se definan na lexislación estatal., segundo o disposto na Lei. Orgánica, 1/2004, do 28 de decembro, de medidas de protección integral contra a violencia de xénero.

#### **Artigo 42.-Procedemento abreviado para a percepción da Renda de Integración Social de Galicia**

1.- A Xunta de Galicia establecerá un procedemento abreviado para a tramitación, concesión e abono da renda de integración social de Galicia (RISGA) para as mulleres que sofren violencia de xénero e cumpran os requisitos legais para a súa percepción. A estos efectos, o recoñecemento do dereito á prestación e o seu aboamento efectivo efectuarase no prazo máximo dun mes dende a solicitude formulada pola interesada ante os servizos sociais correspondentes.

2.-As mulleres acollidas en recursos de carácter residencial teñen dereito a percibir a renda de integración social de Galicia (RISGA), aínda cando a súa manutención básica sexa cuberta por estes centros, sempre que se cumpran o resto de requisitos esixidos para a súa obtención.

#### **Artigo 43.-Axudas escolares**

1.- Para a concesión de axudas escolares, a administración educativa galega, así como a administración local, ponderarán como factor cualificado a situación de violencia de xénero no entorno familiar das e dos menores, especialmente para axudas en materia de gastos escolares, de transporte, de comedor e de actividades extraescolares

2.- En todo caso, a administración educativa asegurará a escolarización inmediata dos nenos e nenas que se vexan afectados por cambios de centro derivados de situacións de violencia de xénero. Así mesmo, facilitarán que os centros educativos lles presten unha atención especial a dito alumnado.

#### **Artigo 44.-Fondo galego de garantía de indemnizacións**

1.- A Xunta de Galicia garantirá a creación dun fondo de garantía a favor das mulleres que sofren violencia de xénero que residan en Galicia, para cubrir o impago das indemnizacións por danos e prexuízos casados que se estableza mediante sentenza xudicial dictada por xulgados e tribunais con sede no territorio galego.

2.- Este fondo empregarase cando exista constatación xudicial de incumprimento do deber de satisfacelas e este incumprimento comporte unha situación de precariedade económica, de acordo cos límites e as condicións que se fixen regulamentariamente.

3.- O Fondo Galego para Impago de Indemnizacións crearase no prazo máximo dun ano a partir da entrada en vigor desta Lei. Con ese fin , a correspondente Lei de orzamentos terá de habilitar unha partida específica con crédito ampliable.

#### **Artigo 45.-Dereito de acceso á vivenda**

A Xunta de Galicia, a través do departamento competente nas políticas de vivenda e solo, garantirá, nos termos que se establezan regulamentariamente, o dereito a unha vivenda ás mulleres que sufran ou sufriran violencia de xénero, e estean en situación de precariedade económica.

#### **Artigo 46.-Acceso prioritario ás vivendas de promoción pública**

As promocións públicas de vivendas reservarán un número de vivendas suficiente co fin de atender as necesidades das mulleres que sufran violencia de xénero e se atopen nunha situación de precariedade económica. As reservas terán en conta ás mulleres con discapacidade.

#### **Artigo 47.-Residencias públicas**

As mulleres maiores e as mulleres con discapacidade que sufran violencia de xénero serán consideradas colectivo preferente para acceder ás residencias públicas, así como as persoas delas dependentes.

### **TÍTULO III DA ORGANIZACIÓN DO SISTEMA DE PROTECCIÓN E ASISTENCIA INTEGRAL FRONTE A VIOLENCIA DE XÉNERO**

#### **Artigo 48.- Criterios básicos**

1.- Os centros e servizos que conforman os recursos de asistencia integral ás mulleres que sofren violencia de xénero teñen como finalidade básica aportar axuda e asistencia directa ás mulleres e as persoas delas dependentes, e apoialas na procura de solucións dos conflitos que se derivan da violencia.

2.- A Xunta de Galicia, a través do departamento competente en materia de políticas de igualdade, garantirá que na totalidade dos centros e servizos que conforman os recursos de asistencia integral, o traballo se realice dende unha perspectiva de xénero.

#### **Artigo 49.-Rede galega de acollemento**

1.- Os centros de acollida son recursos especializados residenciais e temporais que ofrecen acollemento, atención e recuperación ás mulleres que sofren violencia de xénero e ás e aos menores ao seu cargo, que requiren un espazo de protección debido á situación de indefensión

ou risco causada pola violencia de xénero, especialmente pola derivada dunha relación de parella.

2.- Poden ser titulares do dereito de acceso aos centros de acollida as mulleres acrediten mediante calquera dos medios establecido no artigo 5 a súa situación de violencia de xénero.

3.- Os centros de acollida estarán atendidos por equipos multidisciplinares e garantirán un tratamento integral de atención e/ou de recuperación, que abrangan aspectos psicolóxicos, educativos, socio-laborais e xurídicos, e favoreza a normalización da situación persoal das mulleres, da súa unidade familiar e a superación dos efectos da violencia.

4.- As normas e requisitos específicos aos que terán que axustarse os centros de acollida estableceranse regulamentariamente.

#### **Artigo 50.- Creación do Centro de Recuperación Integral para mulleres que sofren Violencia de Xénero.**

1.- A Xunta de Galicia, a través do departamento competente en materia de políticas de igualdade, garantirá a creación dun Centro de Recuperación Integral para mulleres que sofren violencia de xénero.

2.- O Centro de Recuperación Integral para mulleres que sofren violencia de xénero desenvolverá un modelo de atención integral, baseado nun sistema coordinado de servizos, recursos e medias de carácter social, laboral e económico.

3.- O Centro de Recuperación Integral actuará como centro coordinador da rede galega de acollemento

#### **Artigo 51.- Rede de Información ás Mulleres**

1. A Xunta de Galicia, a través do departamento competente en materia de políticas de igualdade, e en colaboración coas entidades locais, garantirá a existencia dunha rede de Información ás Mulleres, distribuída de xeito uniforme polo territorio galego.

2.- A rede de Información ás mulleres desenvolverán accións de carácter preventivo e de sensibilización. Asimesmo, facilitarán información, orientación, derivación e seguimento ás mulleres que sofren violencia de xénero.

3.- A rede de Información ás mulleres funcionará en estreita colaboración cos servizos sociais, sanitarios, de orientación escolar, así como cos servizos de urxencia e de seguridade cidadana para a detección e prevención de situacións de violencia de xénero.

#### **Artigo 52.- Servizo de Atención 24 horas**

1.- O Servizo de Atención 24 horas, dependente do departamento competente en materia de políticas de igualdade, ofrecerá atención e información integral sobre os recursos públicos e privados ao alcance das mulleres en situacións de violencia de xénero.

2.- Serán funcións do Servizo de Atención 24 horas:

- a) escoitar as demandas das mulleres e informar sobre as medidas a adoptar e os recursos dispoñibles.
- b) Conter as situacións de vulnerabilidade emocional e psicolóxica.
- c) Prestar de asistencia e, de ser o caso, derivar ao recurso máis axeitado.
- d) Colaborar e coordinarse coa rede de información ás mulleres, cos servizos de acollida temporal, así como con todos os servizos de urxencia nos casos necesarios.

O Servizo de Atención 24 horas funcionará todas as horas do día e todos os días do ano.

3.- As mulleres poderán acceder ao Servizo de Atención 24 horas sen necesidade de achegar ningún tipo de acreditación da súa situación de violencia de xénero, conservando así mesmo o seu anonimato, sen necesidade de prestar os seus datos de identificación persoal.

#### **Artigo 53.-Punto de Coordinación das Ordes de Protección**

1.- O Punto de coordinación das Ordes de Protección dependente do departamento competente en materia de políticas de igualdade, é o encargado de recibir a comunicación da totalidade das ordes de protección que se diten no territorio de Galicia.

2.- A estes efectos, o Punto de coordinación das Ordes de Protección levará a cabo un seguimento individualizado de cada caso, poñéndose en comunicación coas mulleres que posúan unha orde de protección, coa finalidade de facilitarlles tanta información demanden e articular unha actuación ordenada dos servizos asistenciais e de protección.

#### **Artigo 54.-Puntos de Encontro Familiar.**

1.- O departamento competente en materia de políticas de igualdade garantirá a existencia de Puntos de Encontro Familiar, como un servizo que facilita e preserva a relación entre as e os menores e as persoas das súas familias en situacións de crise, e que permite e garante a seguridade e o benestar das nenas e os nenos, e facilita o cumprimento do réxime de visitas.

2.-A prestación deste servizo debe ser neutral e o seu carácter transitorio. Os Puntos de Encontro Familiar contarán con persoal cualificado para o seguimento da evolución das relacións das nena e dos nenos coas súas familias

3.- As normas e requisitos específicos aos que terán que axustarse os Puntos de Encontro Familiar estableceranse regulamentariamente.

### **Artigo 55.-Creación de Oficinas de Atención ás Víctimas dos Delitos**

1.- A Xunta de Galicia, a través do departamento competente na área de xustiza, garantizará a creación de Oficinas de atención ás vítimas do delito, de xeito equilibrado no territorio galego, dotadas de persoal cualificado, coa finalidade, entre outras, de ofrecer ás mulleres que sofren violencia de xénero información e apoio para que poidan exercer os dereitos que lles reconece a lexislación vixente.

2.- Os departamentos da Xunta de Galicia competentes nas áreas de xustiza e de políticas de igualdade coordinaranse para a planificación conxunta de procedementos e para a formación e actualización permanente do persoal técnico das oficinas na atención, asistencia e tratamento das mulleres que sofren violencia de xénero.

### **Artigo 56.-Titularidade e xestión dos servizos.**

1.-Os servizos do sistema de protección e asistencia integral serán de titularidade pública, municipal ou autonómica, correspondéndolle súa coordinación e supervisión á Administración da Xunta de Galicia a través do departamento competente en materia de políticas de igualdade. Os ditos servizos axeitarán os seus regulamentos de réxime interno ao disposto nesta Lei así como ás demais disposicións que estableza a Xunta de Galicia.

2.- A Xunta de Galicia garantizará un desenvolvemento territorialmente equilibrado do sistema de protección e asistencia integral das mulleres que sofren violencia de xénero.

3.- Co fin de garantir unha protección e asistencia axeitada ás mulleres que sofren violencia de xénero, a Xunta de Galicia poderá establecer fórmulas de colaboración con entidades privadas sen fin de lucro.

### **Artigo 57.-Confidencialidade da información.**

As Administracións públicas titulares do sistema protección e asistencia integral das mulleres que sofren violencia de xénero garantirán, en todo caso, a confidencialidade da información que traten por razón das súas funcións, segundo o establecido na Lei orgánica 15/1999, do 13 de decembro, de protección de datos de carácter persoal.

## **DISPOSICIONS ADICIONAIS**

### **Disposición adicional primeira.- Acordos interinstitucionais e instrumentos de colaboración.**

1- O Goberno da Xunta de Galicia impulsará a formalización e actualización de acordos interinstitucionais de coordinación entre as diversas instancias e Administracións públicas con competencias na materia obxecto desta Lei, que servan de cauce de actuación e colaboración para conseguir unha inserción e asistencia integral e coordinada das mulleres que sofren violencia de xénero nos ámbitos policial, sanitario, social, xudicial e laboral.

2.- Sen prexuízo do establecido no apartado anterior, a Xunta de Galicia habilitará os instrumentos de colaboración necesarios para a prevención e o tratamento da violencia de xénero.

#### **Disposición adicional segunda.-Informacion ao parlamento**

O Goberno da Xunta de Galicia remitirá ao Parlamento, con carácter anual, un informe sobre a situación da violencia de xénero en Galicia, que contará coas achegas de todos os departamentos implicados na prevención e tratamento da violencia de xénero

#### **Disposición adicional terceira.- Avaliación**

A Xunta de Galicia, a través do departamento competente en materia de políticas de igualdade, creará un programa de avaliación e seguimento da aplicación da Lei Galega para a Prevención e Tratamento Integral da Violencia de Xénero

#### **Disposición adicional cuarta.- Creación do Consello Galego das Mulleres**

1.- Créase o Consello Galego das Mulleres, como órgano colexiado e institucional de Galicia, de carácter consultivo, de participación e asesoramento en materia de muller, que terá, entre outras funcións, a de colaborar co Goberno da Xunta de Galicia no desenvolvemento da aplicación desta Lei.

2.- A súa natureza, fins, composición e adscripción estableceranse regulamentariamente

#### **Disposición adicional quinta.-Creación do Observatorio Galego da Violencia de Xénero**

1.- Crearase o Observatorio Galego da Violencia de Xénero, como órgano colexiado e institucional de Galicia, encargado do estudo, avaliación e seguimento das políticas contra a violencia de xénero que de desenvolvan en Galicia

2.- A súa natureza, fins, composición e adscripción estableceranse regulamentariamente .

**Disposición adicional sexta.-**Modificación da Lei 9/1991, do 2 de outubro, de medidas básicas para a inserción social, modificada pola Lei 16/2004, do 29 de decembro.

Engádese o punto 10 ao artigo 24 da Lei 9/1991, do 2 de outubro, de medidas básicas para a inserción social, modificada pola Lei 16/2004, do 29 de decembro, que queda redactado do seguinte xeito: 24.10 “ Cando a persoa beneficiaria da renda de integración social de Galicia posúa a condición de vítima de violencia de xénero, a concesión da renda tramitarase por un procedemento abreviado, e o seu aboamento efectivo efectuarase no prazo máximo dun mes dende a solicitude”.

Engádese o punto 4 ao artigo 14 da Lei 9/1991, do 2 de outubro, de medidas básicas para a inserción social, modificada pola Lei 16/2004, do 29 de decembro, que queda redactado do

seguinte xeito: “Para os efectos previstos nesta Lei, nos casos de violencia de xénero non se considera ao agresor membro integrante da unidade familiar da solicitante, polo que as súas rendas individuais non se computan como recursos económicos da unidade de convivencia”.

## **DISPOSICION DEROGATORIA ÚNICA**

### **Disposición derogatoria única.**

Quedan derogadas cantas disposicións de igual ou inferior categoría contradigan o disposto na presente Lei, e en especial os artigo 19 e 20 da Lei 7/2004, do 16 de xullo, galega para a igualdade de mulleres e homes.

## **DISPOSICIONS FINAIS**

### **Disposición final primeira. Habilitación normativa.**

Facúltase á Xunta de Galicia para dictar cantas disposicións sexan necesarias para a aplicación e desenvolvemento desta Lei.

### **Disposición final segunda. Entrada en vigor.**

A presente Lei entrará en vigor ao día seguinte ao da súa publicación no Diario Oficial de Galicia

Santiago de Compostela, .....de novembro de dous mil seis

Emilio Pérez Touruño  
Presidente

---